

Nagina tema da far naufragi

Partida burgais-democratica dal Grischun

DA GION NUTEGN STGIER/ANR

■ **Dus giadas gea e dus giadas na. Quai han delegadas e delegads da la Partida burgais-democratica dal Grischun (pbd) decidì per las proximas votaziuns federalas. Per defender lur dus sezs en la regenza grischuna saja da persvader il suveran che la pbd tschertga adina soluziuns raschunaivlas.** Sa radunads èn delegads e delegadas da la pbd dal Grischun a Schiers/Aschera per decider las parolas da las votaziuns federalas dals 18 da matg. Quel di elegia il suveran grischun dentant er deputadas e deputads per la proxima perioda d'uffizi dal cussegl grond sco era la regenza grischuna. *Andreas Felix*, il schef da fracziun da la pbd ha ditg als preschents che per avair success tar las elecziuns saja da persvader giuven e vegl che la pbd prestia lavur da persvasiun e cunzunt tschertgia ella er adina schliaziuns raschunaivlas. El ha lura er intimà delegads e delegadas da mobilisar votantas e votants dad ir a l'urna e cunzunt da sustegnair candidatas e candidats da la pbd. *Jon Domenic Parolini*, il president da la pbd grischuna e candidat per la regenza grischuna, ha ditg sin la dumonda da l'anr ch'el quintia insumma betg cun in naufragi da la pbd, sco per exempel tar las tschernas dal parlament en il chantun Berna avant intginas emnas. En quel chantun saja la situaziun e cunzunt er la constellaziun da la pbd tut outra.

Ina pitschna surpraisa

Cussegliera governativa *Barbara Janom-Steiner* ha preschentà il conclus federal davart il provediment medicinal da basa, ditg auter la cunterproposta directa a

l'iniziativa dal pievel «gea a la medischna da famiglia» ch'è vegnida retratga. Unanim han delegadas e delegads decidì da sustegnair quest conclus federal. In cler na e senza ina cuntervusch han ils umens e las dunnas da la pbd ditg na a l'iniziativa che vul introducir ina paja minimala da 4000 francs il mais u almain 22 francs l'ura. Per l'iniziativa ha referì *Hanna Bay*, la presidenta da la ps giuvna da noss chantun e cunter quella iniziativa ha referì *Jon Domenic Parolini*. Cun gronda pluralità han ils preschents ditg gea a la lescha federala davart il fondo per cumparar 22 aviuns da cumbat Gripen. Suentar ina pitschna discussiun han delegadas e delegads decidì stgars cunter l'iniziativa dal pievel «per che pedofils na lavurian betg pli cun uffants». Quella conclusiun saja bain ina pitschna surpraisa, ha ditg *Jon Domenic Parolini*, cun avair decidì la pbd svizra, la partida-mamma, da sustegnair quell'iniziativa.



Cun *Barbara Janom-Steiner*, l'actuala cussegliera governativa e da nov cun *Jon Domenic Parolini* vul la pbd grischuna defender ils dus sezs en la regenza chantunala.

FOTO G.N. STGIER